


■ COLUMNA

Jau sun idiom!

DA ROMAN CAVIEZEL, CUIRA

Grazia fitgun o Domenic cuaint, o Heinrich leusi! Tge fissan nus, rumantschins e rumantschuns, senza vus? Nagut auter che ina muntanera sparpagliada e dischorientada en il criv giraun alpin. Ina rotscha gialignom tschoc ed ignorant che discurra, legia e dovra nossa dultscha e lomma favella senza studegiar, simplamain uschia. Sco uffants pitschens halt, cacalaris che na san betg differenziar il bun dal nausch, il bel dal trid, il genuin da la retorta.

Aber vus, o perspicazis proidiomists e venerads gurus culturals, avais definitiv avert ils eglis a nus auters fustvolkrumantschs. Cun caneras e protestas, cun pressions e plants ans avais vus unids sut l'ensaina dal dschihad idiomistic. E cun vus ans empipain nus uss frestgamain da dretgiras federalas, prescripziuns departamentalas e plans d'instrucziun; quai che quinta è noss moviment dals illuminads. E quel crescha ad in crescher. Nus essan idiom! Mai ans laschain nus unificar e standardisar da quels smaladids avugads linguistics da la chapitala! Davent cun quel standard-verc importà! Ti es dal diavel, bastard placativ... grimantsch ruschun! Ne tu-



dais-chs ne grimantschs, idiomists vulain restar!

Bun, surmecchers e sutsilvans n'èn per il moment anc betg da la partida. Ma quai è be ina dumonda dal temp. Cass cuntrari gidassan lur suenter in zic. A propos: Tge idea quadrata da crear ina nova varianta linguistica! Tschintg idioms tanschan bain per schar or la gritta. Datti insatge pli legher che sa pitgar cun ils vischins dals quals ins conuscha dapi tschientaners ils trics e rampins, las forzas e las deblezzas? Sursilvans cunter Ladins, Surmirans cunter Sutsilvans e tuts cunter Talianis e Tudestgs! Pelvair, ina bella tradiziun. Viva la Griescha.

Dal reminent, chars deputads rumantschs, jau as perdun che vus avais a ses temp gidà activ ad introducir il bastard en la scola rumantscha. No pro-

blem, ci mancherebbe. Vus avais mo vuli il meglier per nus Rumantschs, numnamain raps. In motiv pli che dign. Ed ils pliffers èn culads tut put en la periferia. Per ils pioniers! – Gea, tgi na vules betg esser pionier, perfin en il ravugl rumantsch? Quai è bel e ludavel. Da princip. Aber toch betg cun il grimantsch ruschun, diavelen! – Ma basta, passà è passà. Pli gugent in Paulus oz che in Saulus ier. Ni sco ils vischins dal sid din: Meglio lardi che mai! – Paupers pioniers, la sauna raschun ha halt stuì liquidar vus. Pazienza. Per fortuna aveva il chantun schon pajà avant!

Sche la fin è buna, tut è bun. Magari! Insatgi sto bain magliar ora quella buglia grimantscha cuschinada da la politica. Paupers scolarets torturads e traumatisads da l'alfabetisaziun en in bastard placativ empe da lur bella favella nativa! Quai è in scandal! Tgi paja per ils donns psichics da noss uffants? Co duai il rumantsch survivor sche l'entira giuventetgna è disturbada da spiert? Signur president da la regenza, mettai immediat ina fin a quella situaziun intolerabla. Cas cuntrari stuvain nus purtar plant davant la dretgira europea dals dretgs umans. En num da noss char rumantsch. Jau sun idiom!